

Friedrich Nietzsche e l'Engiadina

■ Il filosof tudestg Friedrich Nietzsche (1844–1900) è stà il pensader ch'ha formulà ils problems e las sfidas da la moderna a moda uschè clervesenta e precisa sco strusch insatgi avant el. Sias scrittiras vegnan edidas fin oz en grond dumber e legidas ed interpretadas tant d'in public laic sco er da filosofs dal fatg. Tar sias ovras las pli impurtantas tutgan «Unzeitgemässe Betrachtungen» (1873–76), «Menschliches, Allzumenschliches» (1878–80), «Die fröhliche Wissenschaft» (1882), «Also sprach Zarathustra» (1883–85), «Jenseits von Gut und Böse» (1886), «Zur Genealogie der Moral» (1887), «Der Antichrist» (1888) ed «Ecce Homo» (1889). La vita da Friedrich Nietzsche sa lascha divider bunamain matematicamain en las suandantas fasas: uffanza e furmazium (25 onns), professura a Basilea (10 onns), onns da viadi e produziun litterara (10 onns), stgiram dal spiert (10 onns). En ses onns da viadi e da la pli gronda produziun litterara (1879–1889) crodan er ils segiurns en l'Engiadina.



Chasa Nietzsche a Segl-Maria.

sias ovras. «I na po gnanc esser quiet ed aut e solitari avunda enturn mai», fa el da savair en ina da sias brevs.

La Chasa Nietzsche oz

Fin l'onn 1960 è la Chasa Nietzsche odierna stada en possess privat. Damai ch'ì deva da quel temp plans da transfurmar la chasa en in manaschi commercial, ha acquistà la Fundaziun Chasa Nietzsche l'edifizi cun l'intent d'al render accessibel a la publicità. Per far quai èn vegnidas formuladas duas finamiras: Per l'ina duai la chasa infurmar en furma d'ina exposiziun davart vita ed ovra da Nietzsche; per l'autra duain las ulteriuras localitads vegnir messas a disposiziun a students, scienziads e perscrutaders sco dimora e lieu da studi, per che la chasa possia servir er en avegnir a la reflexiun spiertala. A quest intent servan er ils Colloquis da Nietzsche ch'han lieu mintg'onn a Segl. A partir dals onns 1980 vegnan en pli – quasi sco terz intent – realisadas en la chasa regularmain exposiziuns d'art contemporan ch'èn enraischadas en la regiun e/u che stattan en relaziun cun Nietzsche.

En ils locals d'exposiziun vegnan musads documents ed objects da Friedrich Nietzsche. La collecziun cumpiglia fotografias e stampats, manuscrits e brevs che derivan dal temp che Nietzsche ha passentà a Segl, la masca da mort originala, musicalias ed ina collecziun complessiva da tut las ovras che Nietzsche ha edi durant

Staziuns da la vita

Uffanza e furmazium (1844–1869)

Friedrich Nietzsche è naschi il 1844 en il vitget da Röcken en la provinza prussiana Saxonia (oz Saxonia-Anhalt). Suenter la mort prematura dal bab è la famiglia ida a star il 1850 en la citad da Naumburg, situada ra-



dund 40 kilometers en il sidvest da Röcken. Qua han Nietzsche, sia mamma e sia sora vivi en il ravugl (feminin) da la parentella. A partir dal 1854 ha Nietzsche frequentà il gimnasi; pervia da sias bunas notas ha el pudì midar en il renumà internat da Pforta, situà dador la citad da Naumburg.

L'onn 1864 ha Nietzsche cumenzà a studegiar filologia classica a l'Universitad da Bonn; in onn pli tard ha el continuà quest studi a Lipsia. Qua è Nietzsche vegni promovì da ses professor Friedrich Ritschl ed ha chattà in bun ami en la persona dad Erwin Rohde. En pli è Nietzsche vegni en contact cun la filosofia dad Arthur Schopenhauer ed ha fatg l'enconuschientscha da Richard Wagner – duas figuras che duevan esser da muntada centrala per ses ulterior svilup.

Professer a Basilea (1869–1879)

Gia il 1869, anc avant ch'el aveva terminà ses studi, è Nietzsche vegni elegi a l'Universitad da Basilea sco professor extraordinari da filologia classica. Pervia da problems finanzials aveva l'Universitad da Basilea decidì d'engaschar giuovens professers, er sche quels stevan pir curt avant la promoziun. Ma Nietzsche aveva tuttaviva gia mussà sias abilitads ed era en pli vegni recumandà da ses mentur Friedrich Ritschl ch'era ina capacitad internaziunala.

A Basilea ha Nietzsche docì en il ravugl da corifeas sco l'istoricher d'art e cultura Jacob Burckhardt ed ha chattà en la citad in ambient republican ch'ha promovì ses spiert liber. Uschia è l'universitad er stada fidaivla al giuven professor cura che quel è vegni attagià il 1872 pervia da sia scrittira davart la tragedia greca.

In ulterior element che dueva influenzar l'ovra futura da Nietzsche è stà il fatg ch'el aveva, sper si' incumbensa da docent a l'universitad, er da dar lezziuns da grec al gimnasi da la citad. Cumbain ch'el sa lamentava en brevs davart quest'ulteriura chargia, ha la confruntaziun cun dumondas pedagogicas modellà decisivamain sia produziun litterara da pli tard.


In'ulteriura coincidenza fortunaivla è stada l'enconuschientscha che Nietzsche dueva far cun il giuven professor da teologia Franz Overbeck. En el ha Nietzsche chattà in ami fidaivel e partenari da discussiun spiertus. Pli tard dueva Overbeck er instradar, ensemen cun il scolar da

Nietzsche Heinrich Köselitz, l'ediziun da sias ovras.

Malruaus intern e problems da sanadad

Malgrà ils avantags menziunads è Nietzsche sa senti serrà en a Basilea e scriva adina puspè en sias brevs da vulair rumper or da quest mund stretg. El aveva l'ambiziun d'esser dapli che «be» in professor basilaus. Ina cumprova da quai dattan sias «escapadas» a Lucerna: Tranter il 1869 ed il 1872 è Nietzsche stà betg main che ventgatrais giadas a Tribschen a visitar il cumponist Richard Wagner ch'el admirava. Er suenter che quel è i a star il 1872 a Bayreuth, ha Nietzsche mantegni il contact fin a lur ruptura il 1878.

Ma er la publicaziun «Die Geburt der Tragödie aus dem Geiste der Musik» dal 1872 ha mussà che Nietzsche sa muveva en ses pensar adina pli fitg davent da la filologia classica en direcziun da la essaistica e filosofia. Già il 1871 aveva Nietzsche candidà adum-



Purtret da Friedrich Nietzsche d'enturn il 1885.

batten per la professura da filosofia vacanta a Basilea.

Ultra da quai è la sanadad corporala e spiertala da Nietzsche pegiurada cuntinuadamain. Gia d'uffant pativa el da mal il chau e mal ils eglis, da migrena e disturbis dal magun. Durant ils onns a Basilea èn quests problems da sanadad daventads adina pli acuts, uschia che Nietzsche ha gia passentà l'enviern 1876/77 in semester da congedi a Napoli. Il 1879 n'era el betg pli abel d'exequir vinavant si' incumbensa a l'universitad ed ha inoltrà sia demissium. En la vegliadetgna da be 35 onns era el daventà, sco ch'el scriva sez, «anteriur professor ed ussa «fugitivus errans».

Onns da viadi e da produziun litterara (1879–1889)
Ils proxims onns ha Nietzsche vivì – per

gronda part da sia pensiu, per part er cun sustegn da ses amis – en tschertga permanenta da relaziuns climaticas ch'al rendevan supportabla sia malsogna. L'enviern sa trategneva el il pli savens en l'Italia (Rapallo, Genua e Turin) u a Nizza. Las stads aveva el chattà en l'Engiadina ina nova patria a la quala el è stà fidaivel sur onns. Tranteren visitava el mintgatant sia famiglia a Naumburg.

Gia cun la publicaziun da «Menschliches, Allzumenschliches» a partir dal l'onn 1878 era la ruptura cun Wagner e la filosofia da Schopenhauer vegnida evidentata. Lentschatta dals onns 1880 èn suandadas ulteriuras ovras en il medem stil aforistic.

Il november 1882 è Nietzsche scappà, suenter avair gi dispita cun sia mamma e sia sora pervia d'ina amur disfortunada, a Rapallo. Chatschà da patrats da suicidi ha el scrit qua en be diesch dis l'emprima part da ses capodovra «Also sprach Zarathustra».

Ils ultims onns avant il stgiram dal spiert èn stads segnads da la lavur vi da sias ulteriuras, la quala vegniva dentant adina puspè interrutta da fasas malsanitschas. Tranteren ha Nietzsche però er fatg novas enconuschientschas ed inizià novas correspundenzas, per exempel cun Carl Spitteler, August Strindberg u cun la Grischuna Meta von Salis.

Fin qua avevan las ovras da Nietzsche strusch chattà la via al public. Ussa ha dentant inizià ina confruntaziun approfondada cun ses stil apparentamain nunaccessibel, ma che dueva daventar decisiv per la superaziun filosofica da la moderna. Sco emprim scuvrider da Nietzsche vala il filosof danais Georg Brandes ch'ha tegni il 1888 a l'Universitad da Copenhagen emprimas prelecziuns davart Nietzsche. Pauc pli tard ha il stil fulminant da Nietzsche evocà vairas undas da recepziun euforica; las pli differentas gruppaizuns han tuttenina cumenzà a sa referir al pensar da Nietzsche. Ma da tut quai n'ha Nietzsche betg pli pudì far persenn: l'entschatta dal 1889 ha cumenzà a Turin il collaps spiertal, dal qual el na dueva betg pli sa revegnir.

Stgiram dal spiert e mort (1889–1900)

Da Turin aveva Nietzsche scrit curts texts, ils uschenumnads «cedels da sturnadad», a differentas persunas ch'al stevan fitg datiers, ma per exempel er a Cosima Wagner (la dunna da Richard Wagner) u a Jacob Burckhardt. Cun quai è la malsogna dal spiert progredenta vegnida evidentata. La raschun per quella n'è betg dal tut clera e vegn discutada a moda cuntraversa.

Il 1893 è la sora da Nietzsche, ch'era stada emigrada en il fratemp en il Paraguai, returnada ed ha surpiglià pli e pli la tgrira dal frar. A medem temp ha ella er cumenzà a controllà il relasch e l'ediziun

da las ovras da Nietzsche – encunter la veglia ed ils princips editorials da Köselitz.

Suenter la mort da la mamma il 1897 è Nietzsche vegni tgrirà da sia sora a Weimar. Ils 25 d'avust 1900 è el mort en la vegliadetgna da 55 onns. El è vegni sepulì a Röcken, ses lieu da naschientscha, en la fossa da famiglia.

Nietzsche en l'Engiadina


L'emprima giada ha Nietzsche visità l'Engiadina la stad 1879, gist suenter avair terminà ses engaschament a Basilea. El aveva udì ch'ì regia qua in clima sitg e sulegliv, ideal per curar sia malsogna. Perquai ha el decidì da passentar la stad a San Murezzan. Ma si'emprima impressiun è stada pauc euforica: en brevs sa lamenta el che San Murezzan saja inunda da turists. Duas emnas pli tard è el dentant surprindì da l'aria clera e da la natira da la regiun. El numna l'Engiadina la terra empermissa e noda schizunt ch'el veglia murir qua.

Nietzsche ha sinaquai tschertgà in lieu nua ch'el pudeva restabilir corp ed olma e sa laschar inspirar da la cuntrada, senza dentant esser expost a la hectica citadina dals centers turistics. Lentschatta fanadur 1881 ha el per l'emprima giada prendi dimora a Segl-Maria en la chasa da la famiglia Durisch, dal president da vischnanca da quel temp. En sia stanza en l'emprima auzada e sin sias spassegiadas a la riva dals lais è Nietzsche sa senti talmain bain ch'el è returnà per sis ulteriuras stads (1883–1888).

Qua ha Nietzsche elavurà numerusas da sias ovras, sco per exempel la segunda part dad «Also sprach Zarathustra», «Jenseits von Gut und Böse», «Zur Genealogie der Moral», «Götzendämmerung» e «Der Antichrist». Lavust 1884 scriva Nietzsche: «Qua sa lascha viver bain, en questa ferma aria clera, qua nua che la natira è – sorprendentamain – a medem temp miaivla, festiva e misteriosa – en sasez na ma plaschi nagliur uschè bain sco a Segl-Maria.»

Surtut en ses capodovra litterar «Also sprach Zarathustra» resorta l'influenza d'ina cuntrada che vegn resentida sco eroica e spectaculara. Il 1888 sa regorda Nietzsche da l'inspiraziun per il «return etern» che furma ina concepziun da basa da quest'ovra: «Lavust 1881 gjeva jau a spass tras ils gauds al Lej da Silvaplana. Jau ma sun fermà sper in crapun en furma da piramida, situà en vischinanza da Surlej. Qua hai jau gi quest'idea.»

Al lieu regorda oz ina plachetta a quest'impurtanta funtauna d'inspiraziun. E sin la penisla Chastè al Lej da Segl fa in'inscripziun endament in ulterior lieu pittoresc che Nietzsche visitava gugent sin sias spassegiadas. Quellas fascheva el adina sulet, approfondà en la concepziun da



Manuscrit da Nietzsche davart il return etern. «Anfang August 1881 in Sils-Maria, 6000 Fuss über dem Meere und viel höher über allen menschlichen Dingen!»

ses temp da vita, per part cun dedicaziuns originalas da l'autur.

L'exposiziun dat dentant er in guard al temp che Nietzsche ha passentà a Basilea (stiva cun il mobigliar original e documents dals onns 1869–79). In'ulteriura part da l'exposiziun permanenta è dettigada a las relaziuns d'auters scripturs, artists e scienziads cun Nietzsche e cun Segl (Hermann Hesse, Thomas Mann, Robert Musil, Theodor Adorno, Paul Celan e.a.).

Sper il spazi d'exposiziun, d'abitat e da perscrutaziun dat la Chasa Nietzsche sutetg ad ina da las pli vastas bibliotecas davart la vita ed ovra da Nietzsche, sco er davart sia recepziun ed interpretaziun (4000 toms en numerusas linguas).

Dapi il 2005 exista plinavant a Segl in post exteriur da l'Institut grischun per la perscrutaziun da la cultura ch'è vegni stgaffi en collavuraziun cun la Fundaziun Chasa Nietzsche. Sut il num KUBUS («Kulturbüro Sils») svilupescha e realisescha quest post projects e publicaziuns scientificas sco er occurenzas cun referats, discussiuns da podium u excursiuns.

La preschentaziun:

Dossier «Chasa Nietzsche a Segl-Maria».

Dapli infurmaziuns:

chatta.ch/?hiid=3476
www.chattà.ch